

## **В СУББОТУ МЯСОПУСТНУЮ**

**ПАМЯТЬ СОВЕРШАЕМ ВСЕХ ОТ ВЕКА УСОПШИХ ПРАВОСЛАВНЫХ ХРИСТИАН,  
ОТЕЦ И БРАТИЙ НАШИХ.**

**В пяток вечера по предначинательном псалме, и обычном стихословии, на  
Господи воззвах, поставим стихов 6: И поем Осмогласника стихиры  
мученичны три, рядоваго гласа:**

**И Триоди подобны, три. Глас 8.**

**Подобен: Во Едеме рай:**

**От** века мертвых днесь всех / по имени верою поживших благочестно, /  
память сотворяюще вернии, / Спаса и Господа воспоим, / просяще прилежно  
сим в час суда ответ благий дати, / Тому Самому Богу нашему, всей судящему  
земли, / деснаго Его предстояния получитьи в радости, / в части праведных, и во  
святых жребии светлем, / и достойным быти Небеснаго Царствия Его.

**Твоею** кровию человеки Спасе искупивый, / и смертью Твоею от смерти  
горькия избавивый нас, / и жизнь вечную подай нам Воскресением Твоим, /  
вся упокой Господи, усопшия благочестно, / или в пустынях, или во градах,  
или в мори, / или на земли, или на всяком месте: / цари же, священники,  
архиереи, монахи, / и бельцы в возрасте всяком всеродном, / и сподоби я  
Небеснаго Царствия Твоего.

**Из** мертвых востанием Твоим Христе, / не ктому смерть обладает  
умершими благочестно. / Темже молимся прилежно: / рабы Твоя упокой во  
дворех Твоих, / и в недрах Авраама, от Адама даже до днесь, / послужившия  
Тебе чисто, / отцы и братию нашу, други вкупе и сродники, / всякаго человека,  
в житии послуживша верно, / и к Тебе преставльшася многовидно и  
многообразно, Боже, / и сподоби я Небеснаго Царствия Твоего.

**Слава, глас 8:**

**Плачу** и рыдаю, егда помышляю смерть, / и вижду во гробех лежащую по  
образу Божию / созданную нашу красоту, / безобразну, и безславну, не имущу  
вида. / Оле чудесе! / Что еже о нас сие бысть таинство? / Како предахомся  
тлению? / Како припрягохомся смерти? / Воистинну Божиим повелением,  
якоже есть писано, / подающаго преставльшимся покой.

**И ныне, Богородичен первый, гласа. Свете тихий:**

**Вместо же прокимена поем Аллилуиа, на глас 8:**

**Стих:** Блажени, яже избрал и приял еси Господи, и память их в род и род.

**Стих:** Души их во благих водворятся.

**На стиховне мученичен гласа, и два мертвена, Иоанна Дамаскина.**

**Стихи же припеваем вышереченныя:**

**Стих:** Блажени, яже избрал и приял еси Господи, и память их в род и род,

**Стих:** Души их во благих водворятся.

**Слава, глас 6:**

**Н**ачаток ми и состав / зиждительное Твое бысть повеление: / восхотев бо от невидимаго и видимаго естества / жива мя составити, / от земли убо тело создав, / дал же ми еси душу, / Божественным Твоим и животворящим вдохновением. / Темже Спасе, рабы Твоя во стране живых, / и в кровех праведных упокой.

**И ныне, Богородичен, глас тойже:**

**М**олитвами Рождшия Тя Христе, / мученик Твоих / и апостол, и пророк, / и святителей, / преподобных, и праведных, / и всех святых, / усопшия рабы Твоя упокой.

**Н**ыне отпускаеши:

**Тропарь, глас 8:**

**Г**лубиною мудрости человеколюбно вся строяй, / и полезное всем подаваяй, едине Содетелю, / упокой Господи, души раб Твоих: / на Тя бо упование возложиша, Творца и Зиждителя и Бога нашего.

**Слава, и ныне, Богородичен, глас тойже:**

**Т**ебе и стену, и пристанище имамы, / и молитвенницу благоприятну к Богу, / Егоже родила еси Богородице безневестная, верных спасение.

**Ектения, и отпуст.**

**По отпущении же Вечерни, творим в притворе паннихиду за усопших, и поем канон рядоваго гласа мертвым.**

## НА УТРЕНИ

по шестопсалми, Аллилуиа, на глас 8.

**Тропарь:** Глубиною мудрости: Дважды. Слава, и ныне, Богородичен: Тебе и стену, и пристанище: **И обычное стихословие.** Чтутся же и слова о мертвых: к Коринфяном в 1-м послании. Поют же ся и Непорочны на две статьи, с припевы: **Благословен еси Господи, научи мя: на глас 5.**

**И по них тропари мертвых, глас 5.**

**Припев:** Благословен еси Господи, научи мя оправданием Твоим.

Святых лик обрете источник жизни и дверь райскую, да обрящу и аз путь покаянием: погибшее овча аз есмь, воззови мя Спасе, и спаси мя.

Благословен еси Господи, научи мя оправданием Твоим.

Агнца Божия проповедавшие, и заклани бывше якоже агнцы, и к жизни нестареемей святии, и присносущней преставльшися: Того прилежно мученицы молити, долгов разрешение нам даровати.

Благословен еси Господи, научи мя оправданием Твоим.

В путь узкий хождшии прискорбный, вси в житии крест яко ярем взявшии, и Мне последовавшии верою, приидите насладитесь, ихже уготовах вам почестей, и венцов небесных.

Благословен еси Господи, научи мя оправданием Твоим.

Образ есмь неизреченная Твоя славы, аще и язвы ношу прегрешений: ущедри Твое создание Владыко, и очисти Твоим благоутробием, и возжеленное отечество подаждь ми, рая паки жителя мя сотворяя.

Благословен еси Господи, научи мя оправданием Твоим.

Древле убо от не сущих создавый мя, и образом Твоим Божественным почтый, преступлением же заповеди паки мя возвративый в землю, от неяже взят бых, на еже по подобию возведи древнею добротою возобразитися.

Благословен еси Господи, научи мя оправданием Твоим.

Упокой Боже рабы Твоя, и учини я в раи, идеже лица святых Господи, и праведницы сияют яко светила, усопшия рабы Твоя упокой, презирая их вся согрешения.

**Слава:** Трисиятельное единого Божества, благочестно поем вопиюще: Свят еси Отче Безначальный, Собезначальный Сыне, и Божественный Душе: просвети нас верою Тебе служащих, и вечного огня исхити.

**И ныне:** Радуйся Чистая, Бога плотию рождшая во спасение всех, Еюже род человеческий обрете спасение: Тобою да обрящем рай, Богородице Чистая благословенная.

Аллилуиа, аллилуиа, аллилуиа, слава Тебе Боже. Трижды.

**Посем ектенна о усопших: Паки и паки:**

**Иерей молитву: Боже духов: Мы же: Господи помилуй, 40.**

**И по возгласе седален, глас 5:**

**Покой Спасе наш, / с праведными рабы Твоя, / и сия всели во дворы Твоя, / якоже есть писано: / презирая яко благ прегрешения их / вольная и невольная, / и вся яже в ведении и не в ведении, Человеколюбче.**

**Слава, и ныне, Богородичен:**

**От Девы возсиявый миру Христе Боже, / и сыны света Тою показавый, помилуй нас.**

**Стихословим же: Господеви поем:**

**Канон же поем святого обители на 6: И Триоди на 8. Поет же ся и вторая песнь без стихословия. И песни Псалтира. Канон Студита творение, в Троичных и Богородичных тропарех краестрочие: Недостойнаго Феодора. Глас 8.**

**Песнь 1.**

**Ирмос: Песнь возснем людие чудному Богу нашему, / свободившему Израиля от работы, / песнь победную поюще и вопиюще: / поим Тебе единому Владыце.**

**Вси помолимся Христу, творяще память днесь от века мертвых, да вечнаго огня избавит я в вере усопшия, и надежде жизни вечныя.**

**Глубиною судеб Твоих Христе, Всепремудре Ты предопределил еси коегождо кончину жизни, предел и образ. Темже яже покры гроб во всякой стране, на суде спаси Всещедрый.**

**Пределы жизни наша давай, темже усопшия от житейския ноци, дне невечерняго сыны покажи Господи, священники православныя, и вся верныя люди Твоя.**

**Яже покры вода, и брань пожат, трус же яже объят, и убийцы убиша, и огонь яже попали, верныя, Милостиве в части учини праведных.**

**Вся презираяй плотския долги наша Спасе наш, во всяком возрасте всего рода человека, пред судищем Твоим постави неосуждены, Тебе Создателю отвечающия.**

**Слава, Троицен: Три единаго Естества пою, Лица самоипостасная, нерожденна Отца, Сына рождшагося, и Духа Святаго: безначальное Царство, власть, Божество едино.**

**Богородичен: Воистинну Ты явилася еси небо на земли, большее вышняго небесе, Безневестная Дево: из Тебе бо возсия Солнце в мире, владычествуяй правдою.**

**Катавасия:** Песнь возснем людие чудному Богу нашему, / свободившему Израиля от работы, / песнь победную поюще и вопиюще: / поим Тебе единому Владыце.

### **Песнь 2:**

**Ирмос:** Видите видите, яко Аз есмь Бог ваш, / прежде век рожденный от Отца, / и от Девы в последняя без мужа заченшийся / и разрушивый грех праотца Адама, / яко Человеколюбец.

**Видите видите,** яко Аз есмь Бог ваш, праведным судом водрузивый пределы жизни, в нетление от тли приемляй вся усопшия в надежди вечнаго воскресния.

**От** четырех конец Господи, приемляй верно усопшия, в мори, или на земли, или в реках, источницех, или езерех, или в ровенницех снеть зверем бывшия, и птицам, и гадом, вся упокой.

**В** Твоей длани всяческая Господи, предразсудил еси, разрешшиися в составы четыре: в пришествии Твоем собрав воскреси, вся яже в неведении, и разуме, прощая тем прегрешения.

**О** страшнаго Твоего втораго, Господи, пришествия! Зане яко в виде молнии на землю пришед, воздвигнеши все создание Твое судитися, в вере Тебе тогда поживших, сретших Тя с Тобою быти сподоби.

**Слава, Троицен:** Пресовершенная Единице, Пребожественная, Триипостасная, нерожденне Отче и Сыне Единородне, Душе от Отца исходяй, Сыном же являйся: Существо едино и Естество, Господьство, Царство, спаси всех нас.

**Богородичен:** Неизглаголанное чудо Твоего Рождества Мати Дево: како бо и раждаеши, и Чиста еси в томже? Како Отроча раждаеши, и не веси искуса мужеска отнюд? Якоже весть паче естества от Мене новолепно Слово Божие рождшееся.

**Катавасия:** Видите видите, яко Аз есмь Бог ваш, / прежде век рожденный от Отца, / и от Девы в последняя без мужа заченшийся / и разрушивый грех праотца Адама, / яко Человеколюбец.

### **Песнь 3.**

**Ирмос:** Утверждей рукою Твоею, Слове Божий небеса, / просвещением Твоего истиннаго познания, / утверди и нас на Тя надеющихся сердца.:

**Прешедшия** жития течение, в славе благочестной праведным одеются венцем сподоби Боже, и вечных благ насладитися.

**Напрасно** восхищенныя, попадаемыя от молнии, и измерзшия мразом, и всякою раною, упокой Боже, егда огнем вся искусиши.

**Присномутное** жития море преплывшия Христе, в нетленное Твоего жития сподоби пристанище притещи, православным житием окормленныя.

**И**хже всякое естество морских и птиц небесных, прият сие Христе, Твоими судьбами, воскреси Боже, в последний день со славою.

**Слава, Троицен:** Умно Божественную Единицу, в три Лица просто купно еже пресеци совокупляю несекома: якоже бо скорость молнии, трисияющая видится во единстве.

**Богородичен:** Недоуменное Твое чудо: без мужа бо раждаеши, и девство Твое Чистая, соблюдаеши рождши. Темже ангел множество, и человеческий род поет Тя во веки.

**Катавасия:** Утвердей рукою Твоею, Слове Божий небеса, / просвещением Твоего истиннаго познания, / утверди и нас на Тя надеющихся сердца.

### **Седален, глас 5:**

#### **Подобен: Собезначальное Слово:**

**Н**ас ради претерпевый Крест и смерть, / и умертвивый ад, / и совоскресивый мертвыя, / преставльшиися от нас Спасе, / упокой, яко Человеколюбец Бог, / и в трепетное и страшное пришествие Твое Жизнодавче, / яко имей множество милости, / Царствия Твоего сподоби.

### **Слава, тойже.**

#### **И ныне, Богородичен:**

**С**корый Твой покров, / и помощь и милость покажи на рабех Твоих, / и волны Чистая, укроти суетных помышлений, / и падшую душу мою возстави Богородице: / вем бо, вем Дево, / яко можеши, елика и хочещи.

### **Песнь 4.**

**Ирмос:** Из горы приосененныя Слове, / пророк, единыя Богородицы, / хотяще воплотитися, / боговидно усмотри, / и со страхом славословяше силу Твою.

**О**тцы и праотцы, деды и прадеды, от первых и даже до последних, во благозаконии умершия и благоверии, вся помяни Спасе наш.

**В** горе, на пути, на местех пустых житие оставльшия в вере, монахи же и бельцы, юноши и старцы, со святыми Христе всели.

**О**т печали и радости прешедшия ненадежно, верою абие пременившия житие, в благоденствии пострадавшия, или злоденствии, вся упокой Спасе наш.

**Я**же уби мечь, и конь совосхити, град, снег и туча умноженная: яже удави плинфа, или персть посыпа, Христе Спасе наш упокой.

**Слава, Троицен:** Странно яко едино, и три, Божество все по единому Лицу нераздельно: Отец бо, Сын, и Дух Святыи есть покланяемъ, яко един Бог.

**Богородичен:** Направи нас Дево, молитвами Твоими, окормляющи обуреваемыя волною греха, во спасительная пристанища, Господородительнице, избавляющи от всяких лютых.

**Катавасия:** Из горы приосененныя Слове, / пророк, единыя Богородицы, / хотяще воплотитися, / боговидно усмотри, / и со страхом славословяше силу Твою.

### **Песнь 5.**

**Ирмос:** Утренюет дух мой к Тебе Боже, / зане свет повеления пришествия Твоего: / имиже убо озари ум наш Владыко, / и настави на стезю жизни.

**К**оегождо память умерших благочестно от века днесь творяще Господи, прилежно Ти вопием: вся упокой со святыми Твоими.

**О**т всякаго, яже приял еси, рода и рода в царех, в князех, или монашествующих православныя, Щедре, вечнаго избави мучения.

**В**сех яже создал еси полезная ведый, имже попустил еси Господи, внезапными падежьми ненадежно умерети, избави муки всякия Боже наш.

**О**гня присно палящаго, и от тьмы несветимыя, скрежета зубнаго, и червия безконечно мучащаго и всякаго мучения избави Спасе наш, вся верно умершия.

**Слава, Троицен:** Единопрестольная, безначальная, Триипостасная Единице, разделением Единство, и вопротив Лицы Естество имущая, во едино нас совокупи хотение Твоих заповедей.

**Богородичен:** Паче огнезрачных серафимов явилася еси Чистая Честнейшая, породши сим неприступнаго Спаса, воплощением обожившаго земнородных смешение.

**Катавасия:** Утренюет дух мой к Тебе Боже, / зане свет повеления пришествия Твоего: / имиже убо озари ум наш Владыко, / и настави на стезю жизни.

### **Песнь 6.**

**Ирмос:** Содержима мя приими Человеколюбче, / грехи многими / и припадающа щедротам Твоим, / яко пророка Господи, / и спаси мя.

**С**мерти разрешив болезни, пострадав Начальниче жизни Боже наш, усопшия от века рабы Твоя упокой.

**Н**еизглаголаннными Твоими судьбами, яже убиша чаровная напоения, отравы, костная удавления, со святыми Господи упокой.

**Е**гда судити будеши всяческим, стоящим нагим и откровенным пред лицом Твоим: тогда Щедре, пощади послужившия Ти верно Боже.

**П**оследнею убо трубою вострубившу Твоему архангелу, в воскресение жизни всех, тогда Христе, рабы Твоя упокой.

От века яже приял еси верныя Боже, род всякий человеческий сподоби, во веки со служащими Тебе, славити Тя.

**Слава, Троицен:** Богоначалие Трисвятое, единопредстольное, Отче, Сыне со Святым Духом, Ты еси Бог мой, вседержительством Твоим содержи все.

**Богородичен:** От корене твоего возсия цвет жизни, Иисее праотче възиграй спасаая мир, от Чистыя Отроковицы Христос Бог.

**Катавасиа:** Содержима мя приими Человеколюбче, / грехи многими / и припадающа щедротам Твоим, / яко пророка Господи, / и спаси мя.

#### **Кондак:**

Со святыми упокой / Христе, души раб Твоих, / идеже несть болезнь, / ни печаль, / ни въздыхание, / но жизнь безконечная.

**Икос:** Сам един еси безсмертный, / сотворивый и создавый человека: / земнии убо от земли создахомся, / и в землю туюжде поидем, / якоже повелел еси, создавый мя и рекий ми: / яко земля еси, и в землю отыдеши: / аможе вси человецы поидем, / надгробное рыдание, / творяще песнь: / аллилуиа.

#### **Синаксарий первее Минеи: таже настоящий.**

#### **Стихи:**

**Не** воспоминай прегрешений умерших Слове,

**Благия** Твоя щедроты мертвы не показуай.

**В** сий день память от века благочестно скончавшихся человекoв всех, божественнейшии отцы узакониша совершати, вины ради сицевы. Понеже бо нецыи безгодную многажды на странстве подъяша смерть, в мори же и непроходных горах, стремнинах же и пропастьех, и пагубах, и гладех, и запалениях, и ледах, и бранех, и студениях, и иния всякия смерти претерпевше: равно же и убозии суще, и немощнии, и узаконенных псалмов и песней памяти не получиша: человеколюбне божественнии отцы движими общно память сих всех творити Соборней Церкви узакониша, от священных апостол приемше, да и узаконенных по части неким случаем не получивше, ныне общею памятью и сии поминаются: показующе, яко и яже о них бываемая, велику тем ходатайствуют пользу. По единому убо образу сице Божия Церковь память сотворяет душам. Второе же, понеже второе Христово пришествие положити на утрешний день хотяху, прилично и душам память сотворяют: якоже убо страшнаго Судию и необиновеннаго умоляюще, обычную милость к ним употребити, и обетованней тех учинити пищи. Инако же, и Адамово изгнание святии хотяще в приидущую изложити Неделю, якоже некое покоище предумышляют. И конечнее всех, еже по нам, настоящим ныне упокоением, да отгуду яко из начала начнут. Еже бо последнее всех от нас поживших от неумытнаго Судии будет испытание, и да человеки сими устрашивше, к поста подвигом сотворят благоудобны. В субботу же присно душам память творим, яко суббота упокоение знаменует еврейски. И умерших убо, яко от житейских и прочих всех упокоившихся и в покоищем дни, за них мольбы творим, еже



убо и на всяку удержася бывати субботу: а еже ныне соборне поминаем, за всякаго молящася благочестиваго. Ведуще убо божественнии отцы, яко яже за усопших бываемыя памяти, глаголю, милостыни и службы велику тем подают ослабу и пользу: и особне и обще сие Церкви творити поущают, от святых апостол сие приемше, яко речеся. якоже и Ареопагит глаголет Дионисий: яко пользует души о них бываемая. Яве убо и от иных многих. Но и от повести по святому Макарию, иже мужа нечестива еллина суху лбину на пути мимоходя обрет, вопрошаше: аще некое когда во аде утешения чувство имут? Тая же отвеща: многу тем ослабу имети, внегда за усопших молишися отче, рекши. Бяше бо сие творя великий и моляся Богу, уведати желая, аще польза некая преждеусопшим отсюда бысть. Но и Григорий Беседовник, молитвою царя Траяна спасе, слышав от Бога, никогдаже ему о нечестивем молитися. Ей убо, и богомерзкаго Феофила Феодора царица святыми мужми и исповедники от мучений исхити и спасе, якоже повествовася. Составляет же о усопших даяния яко благая, и Богослов Григорий в надгробнем слове, еже к Кесарию брату. Великий же Златоуст, еже к Филипписиом, тако рече: умыслим отшедшим пользу, дадим им приличное поможение, милостыни, глаголю, и приношения: ибо великую отраду сим вещь приносит, и наипаче приобретение и пользу. Ни бо всуе, якоже ключися, сия узаконоположишася, и Божией Церкви от Его всемудрых ученик предашася, еже на страшных тайнах память творити священнику о усопших в вере. И паки: во твоём учинении, с чады и сродники снаследника да имать писание твое, и Судиино имя: и память ти да не безчаствует нищих, и аз сим споручник. Глаголет же и Великий Афанасий: аще и на воздух во благочестии скончавыйся положен бысть, не отрицайся масла и свещ, Христа Бога призывая, на гробе запалити: приятна бо суть сия Богу, и многое сия приносяща воздаяние. Аще убо грешен умерый, да разрешиши его прегрешения: аще ли же праведен, да мздам приложение будет: аще же негли кто странен и нищ сый, не имать о сих пекущагося: но Бог Праведен и Человеколюбец сый, намерит и оному за нищету, яко весть, равну милость. Инако же, и приносяй за сицевыя, мзды сопричастует, яко любовь о спасении ближняго показуяй. Якоже инога помазуяй миром, он себе прежде благоухает, якоже и повеленная, и заветы в сицевых. Не исполняющии же, суд всячески имети будут, дондеже убо второе приидет Христово пришествие. Елика убо за усопших бывают, пользу дают, якоже божественнии отцы глаголют: и наипаче малая некая соделавшим благая, егда с живущими бяху сопричтени. Аще убо и некая [суть] яко долгов к целомудрию многих, Божественное глаголет писание, но Божие человеколюбие яко на множае побеждает. Аще бо равный вес обрящется добрых и гнусных, побеждает человеколюбное. Аще же и мало что злых мерило отягчается, преодолевает паки преблагое. Ведомо же буди, яко познают тамо друг друга вси, яже знают же, и яже никогдаже видеша, [якоже божественный глаголет Златоустый, от притчи к богатому и Лазарю сие составляя], обаче не телесным неким образом: един бо возраст вси, и яже от бытия познания примут: зрительным же оком душевным, яко и Богослов в надгробнем слове к Кесарию глаголет: тогда, глаголя, Кесариа узрю светла, славна, яков ми во сне многаши явилася еси, братий любезнейший. Великий же

и многий Афанасий, аще и не глаголет сице в словесех ко князю Антиоху, но в слове о усопших глаголет: яко и даже до общаго воскресения, дадеся святым друг друга познавати и свеселитися: грешнии же и сего лишишася. Святым же мучеником, и яже от нас творимая назирати дадеся, и посещати. Тогда же друг друга вси познают, егда и сокровенная всех явятся. Ведомо же буди, яко ныне в неких местех отлученных души святых пребывают, и грешных паки особь: овии упованием радующася, овии же злых чаянием печалующася. Не взяша бо святии обетования благих и еще, якоже глаголет божественный апостол, Богу лучшее нечто о нас предуведевшу, да не кроме нас совершатся. Подобае же ведати, яко не вси в пропасти впадающии, и во огонь, и в море, и глаголемыя пагубы, и студени и глад, по повелению Божию сие страждут: сия бо суть Божия судьбы, ихже ова бывають по благоволению, ова же по попущению: другая же и ведения ради и прещения, и уцеломудрения иных бывають. И предразумительным убо Словом весть вся и знает, и волю Его бывають, якоже и о птицах глаголет святое Евангелие. Не определевает же сице быти, кроме неких, вкупе еже деятися по случаю, овому убо удавиться, овому же умерети, и овому убо стару, овому же младу: но единою определи соборное человеческое время, и толикия смертей образы, внутрь убо толиких времен, различны смертей образы наносятся. Не убо исперва повелевающе Богу, знающе убо к жительству единого коегождо, совет Божий, время же и образ смерти его сокращает. Аще ли же предопределение жизни, глаголет Великий Василий, но земля еси, и в землю отыдеши гадательствуется. Глаголет бо апостол к Коринфяном пиша: {зач. 149.} зане недостойне причащаетесь, сего ради в вас мнози немощни и нездрави, и спят довольно, сиречь, умирають мнози. И Давид глаголет: {Псал. 101 и 38.} да не возведеш мене в преполовение дней моих, и измерены положил еси дни моя. И Соломон: сыне, чти отца твоего и мать, яко да будеш многолетен. И паки: да не умреш не во время. И во Иове, ко Елифазу Бог глаголет: {Иова 42.} потребил бых убо вас, аще не за Иова раба Моего, якоже показуется, не пределу быти жизни. Аще же кто сие глаголет: предел ми разумевай Божий, волю Его: емуже бо хошет, прилагает, умаляет же другаго, вся к пользе устрояя, и егда восхошет Бог, усмотряет и образ тогда и время. Предел убо кождо жизни есть, якоже Великий глаголет Афанасий, воля и совет Божий, сим словом и глубиною судеб Твоих Христе, исцелиши. И еже Великаго Василиа смерти глаголюща наводятся, пределом жизни скончавшимся, пределы же жизни, волю глаголем Божию. Аще бо предел есть жизни, чесо ради молимся Богу, и врачем и за дети молимся? Ведати же и сие подобает, яко крещеннии младенцы пиши наслаждаются, непросвещеннии же и язычестии, ниже в пищу, ниже в геенну пойдут. Исходящи убо душа от тела, ни едино попечение здешних имать, но о тамошних присно печется. Третины убо творим, яко в третий день человек вида изменяется. Девятины яко тогда все растичется здание, храниму сердцу единому. Четыредесятины же, яко и самое сердце тогда погибает. И рождение бо сице происходит: в третий бо день живописуется сердце, в девятый же составляется в плоть: в четыредесятый же в совершенный вид воображается. За сию вину душам память творим: яже в

праведных Твоих селений учини Владыко Христе, и помилуй нас, яко един безсмертен, аминь.

### **Песнь 7.**

**Ирмос:** В начале землю основавый, / и небеса Словом утвердивый, / благословен еси во веки, / Господи Боже отец наших.

Благочестно от века преставльшихся память творяще, вопием: благословен еси во веки, Господи Боже отец наших.

Внезапу благочестно умерших, и от стремнины всяческия падших, древа, железа, всякаго камене, упокой Боже усопших верных.

В страшное Твое пришествие Щедре, одесную овец Твоих постави, православно Ти в жизни послужившия Христе, и преставльшия к Тебе.

В лице Христе, избранных Твоих вчини Твоя рабы, вопити Тебе: благословен еси во веки, Господи Боже отец наших.

От земли персть содетельствовавый, плоть Духом оживотворивый, Спасе Щедрый, яже приял еси, упокой Боже, в нестареющем животе.

**Слава, Троицен:** Якоже трети солнцы Божество, единым света срастворением да воспоется, Отец, и Сын, и Божественный Дух, един Естеством, но три Ипостасьми.

**Богородичен:** Давидское согласно воспеваем Ти пение, гору Тя Божию нарицающе Дево, в нейже вселився плотию Слово, обоготвори нас духовно в Себе.

**Катавасия:** В начале землю основавый, / и небеса Словом утвердивый, / благословен еси во веки, / Господи Боже отец наших.

### **Песнь 8.**

**Ирмос:** На горе святей прославльшася:

Сокрушивый первее сень смертную, возсияв яко солнце из гроба, сыны Воскресения Твоего сотвори, Господи славы, вся умерших в вере, во веки.

Безвестных и сокровенных Сведетелю, егда имаши открыти дела тьмы и советы сердец наших, тогда не истяжи слова со всеми верою усопшими.

Егда имаши сести на престоле, и повелиши на суд предстати, собранным трубою от конец земли: тогда пощади всех Христе, яко Милостивый.

Умершим напрасно от случаев, от клича же зельнаго и скорого течения, заушения, удушения же, и лягания, Господи славы, верою усопшим ослаби во веки.

Благословим Отца и Сына, и Святаго Духа, Господа.

Яко Единицу Существом пою Тя, яко Троицу Лицы Тя чту: Отче, и Сыне, и Душе Пресвятой, безначальную державу Твоего Царствия славлю во веки.

**Богородичен:** Струи живыя источник запечатленный, показалася еси Богородице Дево: без мужа бо Господа рождши, безсмертия верныя напаяеши водою во веки.

**Хвалим, благословим:**

**Ирмос:** На горе святей прославльшася, / и в купине огнем / Приснодевы Моисеови тайну явльшаго, / Господа пойте и превозносите / во вся веки.

### **Песнь 9.**

**Ирмос:** Проявленное на горе законоположнику / во огни и купине / Рождество Приснодевы, / в наше верных спасение, / песнями немолчными величаем.

**И**деже есть веселящихся жилище святых Твоих Господи, вся от века усопшия, в вере же и надежди радоватися сподоби.

**У**мершия Божиим прещением, смертных громов всяких с небесе изнесенных, земли разседшейся, морю возшумевшуся, вся верныя Христе, упокой.

**В**сякий возраст, старцы и юныя, младенцы и дети, и ссущия млеко, мужское естество и женское, упокой Боже, яже приял еси верныя.

**О**т ядовитых угрызений умершия, от поглощения змиев, от попраiania коней, и от удавления, и обещения от искренняго, верою Ти послужившия упокой.

**К**оегождо по имени в вере умершия, от века и от рода родов, неосужденно предстати Тебе Слове, в пришествии Твоем сподоби.

**Слава, Троицен:** Единый в Троице Боже, слава Тебе непрестанно: аще бо и Бог Кийждо, но един Естеством есть, Отец, и Сын, и Дух, трисветлыми свойствами.

**Богородичен:** Паче ума Рождество Твое: раждаеши бо прежде Сущаго, и млеком питаеши несказанно, Пищедавца миру: держиши же содержащаго вся, Христа единаго Избавителя нашего, Всенепорочная.

**Катавасия:** Проявленное на горе законоположнику / во огни и купине / Рождество Приснодевы, / в наше верных спасение, / песнями немолчными величаем.

### **Ексапостиларий.**

**Подобен: Небо звездами:**

**Ж**ивыми и мертвыми обладай яко Бог, упокой Твоя рабы в селениих избранных: аще бо и согресиша, Спасе, но не отступиша от Тебе.

**Слава: Другий.**

**Подобен: Жены услышите:**

**Упокой** рабы Твоя во стране живых Господи, отонудуже отбеже болезнь, печаль вкупе и въздыхание: очисти яко Человеколюбец, яже в житии согрешиша: един бо безгрешный еси и милостивый, мертвых и живых Владыка.

**Богородичен:** Марие Богоневесто, Христа непрестанно моли о нас рабех Твоих, с богоглаголивыми пророки, и мученик соборы, иерархи же и преподобными, и всеми праведными, снаследники быти Небеснаго Царствия.

**На хвалитех стихиры, на 4, глас 8.**

**Подобен: Во Едеме рай:**

**Приидите** прежде конца вси братие, / персть нашу видяще, / и естества нашего немощное, / и худость нашу и конец узрим, / и органы сосуда плотнаго, и яко прах человек, / снесь червием и тление, / яко сухия кости наша всяко не имущия дыхания. / Во гробы вникнем, где слава? / где доброта зрака? / где благоглаголивый язык? где брови? / или где око? Вся прах и сень: / темже пощади Спасе, всех нас.

**Что** прельщается человек хваляся? / что всеу смущается? брение и сам вмале? / Что не помышляет персть, яко прах, смешение, / и гноя и тления отложение? / Аще убо брение есмы человецы, что прилепихомся земли? / И аще Христу есмы сродни, / что не притекаем к Нему? / И вси отвергше привременную и текущую жизнь, / жизни нетленной последующе, / яже есть Христос, / просвещение душ наших.

**Рукою** Твоею создавый Адама, / и поставивый предел нетления и мертвости Спасе, / и жизни во благодати, / тления же пременивый, к первой преложив жизни, / Сам рабы Твоя Владыко, / яже приял еси от нас, / с праведными упокой, и в лице избранных: / и сих имена написав в книзе животней, / и воскресив во гласе архангелове, / и трубы шуме, / сподоби я Небеснаго Царствия Твоего.

**Христос** воскресе, / разрешив узы Адама первозданнаго, / и адову разрушив крепость. / Дерзайте вси мертвии: / умертвися смерть, пленен бысть и ад с нею, / и Христос воцарися, распныйся и воскресый: / Той нам дарова нетление плоти, / Той воздвизает нас, / и дарует воскресение нам, / и славы оныя с веселием вся сподобляет, / в вере непреклонней веровавша тепле в Него.

**Слава, глас 2:**

**Мертвен:** Яко цвет увядает, / и яко сень мимо грядет, / и разрушается всякий человек. / паки же гласящей трубе, / мертвии вси яко в трусе / востанут к Твоему сретению Христе Боже: / тогда Владыко, яже преставил еси от нас, / во святых Твоих учини селений духи, Владыко, / Твоих рабов присно.

**И ныне, Богородичен:** Радуйся Марие Богородице, / храме неразоримый, / паче же святой, / якоже вопиет пророк, / святой храм Твой, / дивный в правду.

**На стиховне подобны стихи, Феофана, Осмогласника по гласу.**

**Слава, глас 6, Дамаскиново:**

**Б**олезнь Адаму бысть древа / вкушением древле во Едеме, / егда змий яд  
изблева: / тем бо вниде смерть всеродная, / снедающая человека. / Но пришед  
Владыка низложи змия, / и упоение нам дарова, / к Нему убо возопиим: /  
пощади Спасе, и яже приял еси, / со избранными Твоими упокой.

**И ныне, Богородичен, глас тойже:**

**Т**ы еси Бог наш вся в мудрости / содеваяй и совершаяй, / пророки послал  
еси Христе, / прореци Твое пришествие, / и апостолы, проповедати Твоя  
величия. / И овии убо прорекоша пришествие Твое, / овии же крещением  
просветиша языки: / мученицы же пострадавше, прияша яже возжелаху. / И  
молит Тя лик обоих, с Рождшею Тя: / упокой Боже души, яже приял еси, / и нас  
сподоби Царствия Твоего, / Крест претерпевый мене ради осужденнаго, /  
Избавителю мой и Боже.

**Б**лаго есть исповедатися: **Трисвятое, тропарь: Г**лубиною мудрости:  
**Слава, и ныне: Тебе и стену: Присовокупляем же и первый час. И отпуст.**

## НА ЛИТУРГИИ

### Изобразительная: и от канона Триоди, песнь 3, и 6.

1. Прешедшия жития течение, в славе благочестной праведным одетися венцем сподоби Боже, и вечных благ насладитися.
2. Напрасно восхищенныя, попадаемыя от молнии, и измерзшия мразом, и всякою раною, упокой Боже, егда огнем вся искусиши.
3. Присномутное жития море преплывшия Христе, в нетленное Твоего жития сподоби пристанище притещи, православным житием окормленыя.
4. Ихже всякое естество морских и птиц небесных, прият снедение Христе, Твоими судьбами, воскреси Боже, в последний день со славою.
5. Смерти разрешив болезни, пострадав Начальниче жизни Боже наш, усопшия от века рабы Твоя упокой.
6. Неизглаголанными Твоими судьбами, яже убиша чаровная напоения, отравы, костная давления, со святыми Господи упокой.
7. Егда судити будеши всяческим, стоящим нагим и откровеным пред лицом Твоим: тогда Щедре, пощади послужившия Ти верно Боже.
8. Последнею убо трубою вострубившу Твоему архангелу, в воскресение жизни всех, тогда Христе, рабы Твоя упокой.

### По входе тропари:

Апостоли, мученицы и пророцы, / святителие, преподобнии и праведнии, / добре подвиг совершившии, / и веру соблюдшии, / дерзновение имуще ко Спасу, / о нас Того яко Блага молити, / молимся, спаситися душам нашим.

Помяни Господи яко Благ рабы Твоя, / и елика в житии согрешиша прости: / никтоже бо безгрешен, / токмо Ты могий / и преставленным дати покой.

**Слава:** Со святыми упокой, / Христе, души раб Твоих, / идеже несть болезнь, / ни печаль, / ни воздыхание, / но жизнь бесконечная.

**И ныне,** Тебе и стену и пристанище имамы, / и Молитвенницу благоприятную к Богу. / Егоже родила еси, Богородице Безвестная, верных спасение.

**Прокимен Апостола, глас 6:** Души их во благих водворятся.

**Стих:** К Тебе Господи, воздвигох душу мою:

**Апостол к Коринфяном, зачало 146. [1 Кор. 10, 23 – 28.]**

Братие, всѣ ми лѣтъ сѣть, но не всѣ на пользѣ: всѣ ми лѣтъ сѣть, но не всѣ назидаютъ. Никтоже своего си да ищетъ, но еже ближнаго кійждо. Всѣ, еже на торжищи продаемое, идите, ничтоже съмнѣсѣ, за совѣсть: гдѣна во землѣ и

исполненіе є̀. **А́**ще ли кто̀ ѿ невѣрныхъ призываетъ вы, и хощете ити, всѐ предиагаемое вамъ іа́дите, ничто̀же смнѣшесѧ, за совѣсть. **А́**ще ли же кто̀ вамъ речетъ: сїѐ іа̀шлужертвенно є́сть: не іа́дите за Ѳного повѣдавшего, и совѣсть: гдѣна̀ во землѣ и исполненіе є̀.

### **Другий за упокой, к Солуняном, зачало 270. [1 Сол. 4, 13 – 17.]**

**Б**ратне, **Н**е хощѣ же васъ, братїе, не вѣдѣти ѡ̀ оумѣршихъ, да не скорвитѣ, іакоже и прочїи не имѣцїи оупованїа. **А́**ще бо вѣрдемъ, іакъ иисъ оумре и воскресе, та́къ и вѣ оумѣршыхъ во иисѣ приведетъ съ нимъ. **С**їѐ бо вамъ глаголемъ словомъ гдѣнимъ, іакъ мы живѣцїи, ѡста́вшїи въ пришествіе гдѣне, не имамы предварїти оумѣршихъ: іакъ самъ гдѣ въ повелѣнїи, во гласѣ архангѣловѣ и въ трѣвѣ вжїи снїдетъ съ нбсѣ, и мѣртвїи ѡ хрїтѣ воскреснѣтъ пѣрвѣе: потѡмъ же мы, живѣцїи ѡста́вшїи, кѣпнѡ съ ними восхїцѣни вѣдемъ на ѡблацѣхъ въ срѣтенїе гдѣне на воздѣсѣ, и та́къ всегда съ гдѣмъ вѣдемъ.

**Аллилуиа, глас 6: Блажени, яже избрал, и приял еси Господи.**

**Стих: И память их в род и род.**

### **Евангелие от Луки, зачало 105. [Лк. 21, 8 – 9, 25 – 27, 33 – 36.]**

**Р**ече **Г**осподь **С**воим оучеником: влудїте, да не прельщѣни вѣдете: мнози бо прїидѣтъ во йма̀ моє, глаголюще, іакъ азъ є́смь: и вре́мѧ приближисѧ. **Н**е изыдите оубо вѣсѣдъ ихъ. **9** **Ѵ**гда же оуслышите вранїи и нестроєнїа, не оубойтесѧ: подобаетъ бо сїмъ быти прѣжде: но не оу̀ авїе кончїна. **И** вѣдѣтъ знаменїа въ солнцѣ и лнѣ и звѣздахъ: и на землїи трѣга̀ іазыкомъ ѿ нечлнїа шѡма морскѧго и возмѣненїа, издыхающымъ чловѣкомъ ѿ стрѧха и члнїа градѣщихъ на вселеннѡ: сїлы бо небесныа̀ подвигнѣтсѧ, и тогда оузрѧтъ сѣа члвѣческа градѣща на ѡблацѣхъ съ сїлою и славою мно́гою. нево и землѣ мїиш идетъ, а словеса̀ моѧ не имѣтъ прейти. **В**неми́те же себѣ, да не когда̀ ѡтѧгїають сердца̀ ва́ша ѡблѣденїемъ и пїанствомъ и печальми житѣйскими, и найдетъ на вы внезапѡ дѣнь тѡй: іакъ сѣтъ во прїидетъ на всѧ живѣщыхъ на лицы̀ всѐ землї: вдїте оубо на всѧко вре́мѧ мо́лїтсѧ, да сподобитесѧ оубѣжати всѣхъ сїхъ хотѣщихъ быти, и стати прѣд сѣомъ члвѣческимъ.

### **Другое усопшим, от Иоанна, зачало 16. [Ин. 5, 24 – 30.]**

**Р**ече **Г**осподь **С**воим оучеником: **А́**минь, а́минь глѡ вамъ, іакъ слѣшай словеса̀ моего̀ и вѣрѣай посла́вшеиш мѧ̀ ймать живѡтъ вѣчный, и на сѣдъ не прїидетъ, но прѣидетъ ѿ смѣрти въ живѡтъ. **А́**минь, а́минь глѡ вамъ, іакъ градѣтъ часъ, и



ниѣ ѣсть, егда мѣртвиѣи оуслышатъ гласъ сѣа вѣїа и оуслышавше ѡживѣтъ. **Ѧ**коже во оцѣ имать живѣтъ въ себѣ, такъ даде и сѣови живѣтъ имѣти въ себѣ и ѡвласть даде емѣ и сѣдѣ творити, ѡкѡ сѣа чѣвѣчь ѣсть. **Не** дивитеса сеиѣ: ѡкѡ грядѣтъ часъ, въ онъже вси сѣциѣи во гробѣхѣхъ оуслышатъ гласъ сѣа вѣїа, и изыдѣтъ сотворѣши блгаѣ въ воскрѣшеніе живѣа, а сотворѣши злаѣ въ воскрѣшеніе сѣдѣ. **Не** могѣ азъ ѡ себѣ творити ничесѡже. **Ѧ**коже слышѣ, сѣждѣ, и сѣдѣ мой прѣвѣнъ ѣсть, ѡкѡ не ицѣ воли моеѣ, но воли послаѣвагѡ мѣ оцѣа.

**Киноник:** Блажени, яже избрал, и приял еси Господи, и память их в род и род.

Ведати же подобает, яко сие последование бывает непременно и в субботу святая Пятыдесятницы.